



1. marts 2024

UPA 2024/155

Inatsisartut suleriaasianni § 33 naapertorlugu aalajangiiffigisassaattut siunnersuut imaattoq matumuuna saqqummiuppara.

**Royal Greenland suleqatigalugu saarullinnik uumatitsivinnik amerlanerusunik
pilersitsisoqarnissaanik pilersaarusiortoqarnissaanik Naalakkersuisut peqquneqarnissaanik
Inatsisartut aalajangiiffigisassaattut siunnersuut**

(Inatsisartuni ilaasortaq, Siverth K. Heilmann, Atassut)

Tunnqavilersuut:

Inatsisartunut UKA 2022/98 saarullinnik uumatitsivissorluni tunisassiorneq, toqusoortigineqartartullu eqqaannarnagit tamatsinnut aningaasarsiutiginerunissaat, nunatta ilaani immikkoortortaqaalersinnaanera siunertaralugu inatsisartunut oqallisiara soqutigineqarluarpoq, aalajangiiffigisassatullu saqqummiunneqarsimannginnera uggorineqarluni.

Ukiorpasuarni aalisarneq aqutigalugu, aalisartut tunisassiorfiillu aningaasaasarsiornerat naleqalersitsinerunissamillu siunertaqarluta partii Atassut tunuliaqutaralugu, inatsisartut aqutigalugit saqqummiussaqartarnerput nutaarsiassanngilaq.

Nunani allani aalisagaq qaqqinneqartoq tamaviat, aalisartunit tunisassiorfinniillu avammut niuernerminni aningaasarsiutigigaat, uagut aalisakkat pisarisuukkagut tunineqarsinnaanngitsut, aningaasarsiutiginnngivillugit avammut eqqaannartakkagut amerlaqaat. Oqaluinnarani tunisassiorusuttut piunassuseqalersinnissaannut politikikkut aqutissiuunnissaannullu tamatta pikkorinnerujussuusariaqarnerput Atassummiit oqariartuutiguarparput.

Imartarujussuatsinni aalisagaqassuseq pisuussutillu uumassusillit allat, tammakartarneri takkusimaartarnerilu, pinngortitap allanngorartarnera aqussinnaanngilarput, aalisartulli piniartullu naleqqussartarpugut, soorlu aamma politikikkut naleqqussaannissamut pisussaaffilerneqartartugut.

Bundgarnersorluni saarullinniarnaq, uumatillugillu tunisassiorneq Nunatsinni nutaajusoq pitsaaquteqararaluaqarpoq. Umiarsuarli assartuutaasoq ataasinnaammat, aalisartunut tuniseqqinnissap tullianut, sapaatillu akunnerini arlalissuarni utaqqitisoqartuarmat toqusoortigineqartartut igiinnarneqartartullu annertusinnaasartut tusartuarpagut.

Biolog-it aalisagaqassusimut nalilersuisarnerat, pisassiinernullu Naalakkersuisunut inassuteqartarnerat annikigintartunut ilisimaarilluarparput. Aalisagaqassuseq qangaaniilli kingumut



annertusiartuinnarnera aammalu qulaani eqqartukkama toqusoortigineqartartut pillugit, taamaaginnartussatut isigissanngilarput iluarsiiartariaqarpugut.

Aalisartut kattuffiillu toqusoortuutaasartut iliuseqartariaqarnitsinnut oqariartuuteqartarput. Nutaarsiassaangilaq akit pitsaanerulernissaannik paasinarluartumik oqariartuuteqartuarnarat. Aalisakkat akiinut naammaginnikkunnaarneq tusartuurtarpagut, namminerlu aalisakkanut tunitsiviliornissaminnik siunniussaqaarnerat tusartalerparput.

Tamaanga killittariaqalersimagutta immitsinnut aperisarialissaagut, taava aalisakkanut tunitsivioereersut sussavagut? matuinnassavagut? Akigitinneqartunummi naammaginnittoqannginnera pissutaalluni kingunerluutaasinnaasoq ernumanaqaaq.

Politikkikkut akinut akuliusinnaangilagut, taamaattorli Naalackersuisut pisinnaatinneqarnerisigut, pissutsit immikkut ittut akit apparpallaarpata orsussarluunniit qaffappallaarpat tapiissuteqartoqarsinnaasarnera misilittagaqarfigereerparput.

Taamatut tunngavilersorlunga naaperiaataasinnaasumik isumatuumillu siunissatsinnut suli qaamanerusement alloriaqqinnissamut, inatsisartut Naalackersuisullu peqatiseraassi. Aalajangiiffigisassaq itigartiinnarneqarnissaa takorloorsinnaangilara, naaperiutaasinnaasussanulli suleqataarusogaannga.

Aningaasatigut ingerlatsinikkullu pisortanut kingunerisassai:

Naatsorsuutigineqarsinnaavoq allaffissornikkut aningaasartuutissat AC fuldmægtigep ukiup affaanut nalilimmik suliaqarnera 250.000kr-mik naleqassasoq.

Namminersortunut aningaasarsiornikkut allaffissornikkullu kingunerisassai:

Soqanngilaq

Innuttaasunut aningaasarsiornikkut allaffissornikkullu kingunerisassai:

Soqanngilaq